

2011

Bridge klub Sarajevo

Ranko Tica

[RAZVOJ LICITACIJE NA OTVORE NA 2 NIVOU]

U dokumentu je obrađen osnovni razvoj licitacije na otvore na 2 nivou. U prvom dijelu dokumenta data je osnovna podjela otvora na drugom nivou na slabe i jake otvore. U nastavku dokumenta je dat razvoj licitacija na jake otvore i na slabe baražne otvore.

SADRŽAJ

OTVORI NA 2. NIVOU	2
PODJELA OTVORA NA 2. NIVOU.....	2
OTVOR 2 ♣ (TREF).....	2
Odgovori na otvor 2 ♣	3
Nastavak licitacije otvarača nakon odgovora na otvor 2 ♣	4
Nastavak licitacije nakon druge licitacije otvarača poslije odgovora na otvor 2 ♣	5

OTVORI NA 2. NIVOU

Već smo se upoznali sa pravilom da se svi listovi snage između 13 i 21 poena otvaraju na prvom nivou. Šta je sa ostalim listovima snage iznad 22 poena i nekim listovima snage ispod 13 poena. Za te listove previđeni su otvori na drugom nivou.

PODJELA OTVORA NA 2. NIVOU

Svi otvori na 2. nivou mogu se generalno podijeliti u dvije kategorije:

- Jaki otvori na 2. nivou
- Slabi otvori na 2. nivou

Među jake otvore na 2. nivou spadaju:

- Otvor 2 ♣
- Otvor 2 NT

Među slabe otvore na 2. nivou spadaju otvori:

- 2 ♦
- 2 ♥
- 2 ♠

Razmotrimo najprije jake otvore na 2. nivou (2 ♣ i 2NT).

JAKI OTVORI NA NIVOU 2.

OTVOR 2 ♣ (TREF)

Otvor 2 ♣ spada u jedan od najjačih otvora u bridgu.

Uslovi za otvor 2 ♣ od strane otvarača su:

- Otvarač ima 22 i više poena
- Otvarač nema pravilan list sa 21-22 poena jer se taj list otvara 2 NT

Listovi snage 22 i više poena ne mogu se otvoriti licitacijama 1 ♣, ♦, ♥ ili ♠ zato što ćete prekršiti pravilo koje kaže da za otvor licitacije na prvom nivou trebate imati između 13 i 21 poena. U tom slučaju morate otvoriti licitaciju licitirajući 2 ♣. Dodatni uslovi za otvor 2 ♣ su da otvarač nema specifične karte sa balansiranim (pravilnim) listovima 21-22 poena jer se u tom slučaju koristi otvar 2 NT. Svi ostali balansirani i nebalansirani listovi snage 22 i više poena se otvaraju 2 ♣. Licitacija 2 ♣ je vještačka forsing licitacija i ona ne govori ništa o kvalitetu ili dužini boje ♣, ona samo znači da imate list sa više od 22 poena.

Primjer lista koji zadovoljava uslove za otvor 2 ♣:




23 honersko-distributivna poena

ODGOVORI NA OTVOR 2 ♣

Kao što smo već rekli otvor 2 ♣ je vještački forcing otvor, što znači da on ništa ne govori o kvalitetu i dužini boje tref (zato je vještački) i partner otvarača ga ne smije pasirati (zato što je forcing). Iz ove druge činjenice da se ne smije pasirati proističu moguće licitacije partnera otvarača na otvor 2 ♣. Otvor 2 ♣ se takođe zove i 'game forcing' (forcing do manše) zato što sem u rijetkim situacijama licitacija para koji je otvorio 2 ♣ ne smije da se završi prije manše.

Pogledajte slijedeći primjer kao ilustraciju te činjenice:



Otvarač ima list snage 23 poena, a njegov partner veoma slab list sa singlom u najboljoj boji otvarača. Ipak ova lista zajedno mogu napraviti manšu 4 ♥ jer sam otvaračev list ima 10 štihova ako je adut boja ♥.

Sve licitacije partnera otvarača na otvor 2 ♣ dijele se u dvije kategorije:

- Negativne licitacije
- Pozitivne licitacije

Jedina negativna licitacija partnera otvarača na otvor 2 ♣ je:

- 2 ♦

Licitacija 2 ♦ znači da partner otvarača ima manje od 8 poena. Ova licitacija je vještačka, što znači da ona ništa ne govori o kvalitetu i dužini boje ♦, ona samo znači da partner otvarača ima manje od 8 poena. I ova licitacija je forcing licitacija kao i sam otvor 2 ♣. Forcing je zato što i sam manje od 8 poena uzimajući u obzir da otvarač ima 22 i više poena, manša je vrlo izgledna da se licitira i napravi. Znači otvarač ne smije pasirati licitaciju 2 ♦ iako je ona negativna licitacija njegovog partnera.

Sve ostale licitacije partnera otvarača se zovu pozitivne licitacije i njihova osnovna odlika jeste da su to licitacije sa 8 i više poena. U pozitivne licitacije spadaju:

- 2 ♥
- 2 ♠
- 3 ♣
- 3 ♦
- 2 NT

Licitacije 2 ♥, 2 ♠, 3 ♣ i 3 ♦ se koriste kad partner otvarača ima 8 i više poena i 5 i više karata u toj boji sa dvije od ukupno 3 najviše karte (A, K, Q). Ako partner otvarača ima više od 8 poena i nema 5 karata ni u jednoj od boja ili ima 5 karata ali bez dvije od 3 najviše karte onda se licitira 2 NT. Sve pozitivne licitacije na otvor 2 ♣, su naravno forsing licitacije i istovremeno licitacije koje invitiraju slem. Razlog je očigledan. Sa 22 i više poena kod otvarača i 8 i više poena kod njegovog partnera, ukupan zbroj njihovih poena je vjerovatno preko 30 i vrlo moguće da je mali slem za koji je potrebno 33 i više poena izgledan, a možda čak i veliki slem za koji je potrebno 37 i više poena.

Zapamtite da ako imate 5 i više karata u boji ♦ (sa dvije od tri najviše karte) i 8 i više poena na partnerov otvor 2 ♣, treba da odgovorite 3 ♦ (sa preskakanjem jednog nivoa) zato što je licitacija 2 ♦ rezervisana za vještački negativni odgovor na otvor 2 ♣.

Primjetite da u uslovu za pozitivni odgovor u nekoj od boja morate imati najmanje dvije od tri najviše karte u toj boji (A, K, Q). Ovaj uslov se ponekad može ublažiti ako imate ekstra dužinu u toj boji, recimo 6 i više karata ili ako imate jednu od tri najviše karte ali sa srednjim vezanim kartama (10, 9, 8).

Kao što je više puta do sada rečeno u bridgu postoje pravila, ali ona nisu striktna do te mjere da se moraju slijepo slijediti. Razlog je u činjenici da je broj mogućih kombinacija listova daleko veći od mogućnosti bilo kog sistema licitacije da ih detaljno do tančina opiše. Zato je ponekad u bridgu potrebno raditi aproksimacije i jedan list licitirati kao njemu najbliži odgovarajući za koji postoji neko pravilo.

NASTAVAK LICITACIJE OTVARAČA NAKON ODGOVORA NA OTVOR 2 ♣

Nastavak licitacije otvarača nakon odgovora njegovog partnera na otvor 2 ♣ zavisi naravno od samog odgovora njegovog partnera kao i od distribucije karata po bojama u njegovom listu. Ovdje generalno razlikujemo dva nastavka licitacije:

- Licitacije nakon negativnog odgovora 2 ♦
- Licitacije nakon pozitivnih odgovora 2 ♥, 2 ♠, 3 ♣, 3 ♦ i 2NT

Nakon negativnog odgovora jasno je da slem nebi trebalo licitirati sem u nekim iznimnim situacijama koje sežu u zonu malo vjerovatnog, ali je zato manša još uvijek vrlo izgledna i očekivana. Zato se na negativnu licitaciju partnera otvarač ponaša tako da nastoji da što brže i preciznije opiše svoj list. On to radi na 2 načina:

- Licitacijom svoje najbolje 5 i više karatne boje ako je posjeduje
- Licitacijom 2 NT ako nema 5 i više karatnih boja i ima 22-24 poena (pravilna distribucija)
- Licitacijom 3 NT ako nema 5 i više karatnih boja i ima 25-27 poena (pravilna distribucija)
- Licitacijom 4 NT ako nema 5 i više karatnih boja i ima 28-30 poena (pravilna distribucija)
- Licitacijom 5 NT ako nema 5 i više karatnih boja i ima 31-32 poena (pravilna distribucija)

Ako otvarač ima dvije 5 i više karatne boje onda licitira najprije više, a ako bude potrebno u narednom krugu licitacije licitira i nižu 5 i više karatnu boju.

Ako otvarač ima tri 4 karatne boje onda ne može da licitira NT već licitira najnižu 4 karatnu boju i tako ostavlja prostora sebi i partneru da pronađu najbolji fit ili da na kraju konačni kontrakt završu u NT ako partner otvarača pokriva boju u kojoj otvarač ima singl.

Nakon pozitivnog odgovora otvarač zna da je manša sigurna i da je izvjestan i moguć i slem. Njegova licitacija treba da slijedi osnovne bridge postulate:

- Podrži partnera u njegovoj boji ako imate fit
- Licitiraj svoju 5 i više karatnu boju ako nemate fit
- Licitiraj NT ako ne možeš podržati partnera niti imaš svoju 5 i više karatnu boju koju možeš licitirati

Ako je partner otvarača licitirao svoju 5 i više karatnu boju i otvarač ima podršku za tu boju (3 i više karata) onda je prioritet pokazati partneru da imate podršku time što ćete partnerovu boju licitirati na prvom slijedećem nivou i ostaviti partneru mogućnost da on zaključi licitaciju u manši ili nastavi dalje licitirati druge boje ako ima interesa za slem.

Ako otvarač nema podršku u partnerovoj boji onda može i treba da licitira svoju 5 karatnu boju gdje očekuje podršku od partnera. Ako otvarač nema ni jednu 5 i više karatnih boja kao ni podršku za partnerovu boju onda treba da licitira NT na odgovarajućem nivou uvažavajući činjenicu da partner ima 8 i više poena.

NASTAVAK LICITACIJE NAKON DRUGE LICITACIJE OTVARAČA NA OTVOR 2 ♣

Nastavak licitacije partnera otvarača nakon odgovora njegovog partnera na otvor 2 ♣ i ponovne licitacije otvarača zavisi prije svega od toga da li licitacija teži manši ili slemu, što je već u prve 2-3 licitacije ustanovljeno. Moguće je da se već nakon te prve 2-3 licitacije otvarača i njegovog partnera licitacija završila u manši jer je pronađen fit i ustanovljeno da nema dovoljno poena za slem ili je pak licitirana manša u NT jer nema fita i opet nema dovoljno poena za slem. To je najčešći slučaj kada je partner otvarača na otvor 2 ♣ u svojoj prvoj licitaciji koristio negativnu licitaciju 2 ♦.

Nakon negativnog odgovora na otvor 2 ♣ to jeste nakon licitacije 2 ♦ otvarač je ili licitirao svoju 5 i više karatnu boju ili je licitirao NT na odgovarajućem nivou. Njegov partner u svom drugom govoru (licitaciji) treba ili da podrži otvarača ako ima fit u njegovoj boji ili da licitira svoju 5 i više karatnu boju (ispod 3 NT) ili da licitira 2NT ili 3NT ako nema ispunjen ni jedan od ovih uslova. U svakom slučaju treba se držati pravila da ako je partner otvarača prijavio slabi list sa manje od 8 poena da se licitacija 5 karatnih boja može i treba odvijati do 3 NT, ali da ne treba da ide preko te licitacije ako nije pronađen odgovarajući fit, već treba onda ostati u 3 NT kao najčešće najboljoj manši. Naravno u slučaju da je otvarač otvorio 2 ♣ sa 7 ili 8 karata u nekoj boji onda on može i bez potvrde podrške partnera da zaključi manšu u toj boji ako mu je partner licitirao 2 ♦ (prijavio slabi list do 7 poena).

U slučaju da je licitacija partnera otvarača na otvor 2 ♣, bila pozitivna nastavak licitacije se svodi na činjenicu utvrđivanja postojanja fita u nekoj boji, što se odvija u procesu naizmjeničnog licitiranja najboljih 5 karatnih boja (a ako je moguće i 4 karatnih u narednim krugovima licitacije), dok se ne pronađe fit ili licitacijom NT ako nema 5 karatnih boja i ne postoji podrška u ni u jednoj boji. Treba imati na umu da je vrlo moguća i licitacija slema u ovakvim situacijama jer je inicijalno ukupni zajednički broj poena 30 i više. Zato kad se i ako se pronađe fit u nekoj boji licitacija vrlo često i vrlo brzo završava u malom ili čak velikom slemu.

Partner otvarača treba se takođe držati jednog jednostavnog pravila, a to je da sa rukom do 8 poena ako ima podršku u partnerovoj boji treba direktno licitirati manšu u toj boji, a sa rukom jačom od 8 poena treba dati podršku na 3. nivou ako je to moguće ili licitirati novu boju na 4. nivou što je jedna vrsta konvencije i ona je znak partneru da imaju fit i da je list njegovog partnera jači od 8 poena te da ima interesa za slem.

OTVOR 2NT

Otvor 2 NT je drugi jaki otvor na nivou 2. i po svojim karakteristikama veoma je sličan otvoru 1NT osim što se razlikuje po snazi. Uslovi za otvor 2 NT od strane otvarača su:

- Otvarač ima 21 do 22 honerskih poena u listu
- Otvarač nema ni jednu 5+ karatnu majorsku boju u listu
- Otvarač nema ni jedan singl ili void u listu
- Otvarač nema dva dubla u listu

Otvor 2 NT je veoma precizan otvor koji partneru otvarača daje jasnu sliku o listu otvarača. On zna da otvarač ima pravilan list (distribucije 4-3-3-3; 4-4-3-2; 5(minorska boja)-3-3-2), ima vrlo uzak raspon honerskih poena 21-22 i u bilo kojoj boji ima barem 2 karte. To partnera otvarača stavlja u poziciju da on upravlja licitacijom (da bude kapiten) a samim tim otvarača stavlja u poziciju da odgovara na upite (buduće licitacije) svoga partnera.

Dalji razvoj licitacije na otvor 2 NT je takođe veoma sličan razvoju licitacije na otvor 1 NT. Prvi govori partnera otvarača zavise prije svega od njegove poenske snage. Njegov generalni pristup pri izboru prvog govora na otvor 2 NT zavisi od toga da li u svom listu ima:

- 0-3 poena
- 4-10 poena
- 11 i više poena

ODGOVORI NA OTVOR 2 NT

Sa listom od 0-3 poena partner otvarača ne može da sagleda manšu i treba licitaciju zaustaviti u parcijalnom kontraktu. Postoje samo dvije moguće licitacije da se to uradi:

- Pass – sa pravilnom rukom i 0-3 poena
- Licitacija 3 ♦, 3 ♥, 3 ♠ sa 5 i više karata u toj boji što je za otvarača takođe sign-off licitacija koju treba da pasira.

Sa listom snage 4-10 poena partner otvarača treba da licitira manšu i to može uraditi na nekoliko načina zavisno od distribucije svojih karata. Razlikujemo opet dva slučaja:

- 3NT – sa pravilnom rukom bez 4 karatanih majorskih boja
- 3 ♣ - Stayman sa jednom ili obje 4 i više karatnih majorskih boja

Princip je sličan kao i kod otvora 1 NT. Sa pravilnim listovima bez 4 i više karatnih majorskih boja, partner otvarača treba direktno da locira krajnji kontrakt u 3 NT. Sa listovima koji sadrže jednu ili obje 4 karatne majorske boje treba da se licitira Stayman, kao upit otvaraču za njegove 4-karatne majorske boje. Nastavak licitacije je opet sličan kao i kod otvora 1NT i korištenja Stayman konvencije. Otvarač će na 3 ♣ da odgovori:

- 3 ♦ - ako nema ni jednu 4 karatnu majorsku boju

- 3 ♥ - ako ima 4 karte ♥ (i možda 4 karte ♠)
- 3 ♠ - ako ima 4 karte ♠ bez 4 karte ♥

Nastavak licitacije partnera otvarača je jednostavan. Ako otvarač nema ni jednu 4 karatnu majorsku boju treba da licitira 3 NT. Ako je otvarač licitirao njegovu 4 karatnu majorsku boju treba da zaključi manšu u toj boji. Ako je otvarač licitirao drugu 4 karatnu boju partner otvarača treba da licitira 3 NT. U slučaju da je otvarač licitirao 3 ♥ što znači da ima 4 karte ♥ i možda 4 karte ♠, na narednu licitaciju svoga partnera 3 NT, treba da licitira 4 ♠, jer Stayman konvencija garantuje da partner otvarača ima bar jednu 4 karatnu majorsku boju.

Sa listom snage 11 i više poena partner otvarača treba da pokuša licitirati slem. Proces licitiranja slema, opet zavisi od distribucije partnera otvarača.

Moguće licitacije partnera otvarača su:

- 6 NT – sa pravilnim listom bez 4 karatnih majorskih boja i sa 11-15 honerskih poena
- 7 NT – sa pravilnim listom bez 4 karatnih majorskih boja i sa 16+ honerskih poena
- 3 ♣ - Stayman sa jednom ili obje 4 karatne majorske boje

Prve dvije licitacije su same po sebi jasne. Partner otvarača direktno zaključuje kontrakt u odgovarajućem slemu zavisno od toga koliko ima kombinovanih poena sa otvaračem.

Treći slučaj sa korištenjem licitacije 3 ♣ je nastojanje partnera otvarača da nađe najprije mogući fit sa otvaračem u nekoj majorskoj boji koju i on posjeduje i ako odgovor otvarača bude takav da su pronašli odgovarajući fit onda kontrakt zaključuje na 6. ili 7. nivou u toj majorskoj boji (zavisno od poena). A ako je slučaj da nema fita u majorskim bojama onda kontrakt opet zaključuje sa 6 ili 7 NT.

SLABI OTVORI NA NIVOU 2.

Dugo vremena su se svi otvori na nivou 2 u prirodnim sistemima licitacije smatrali jakim otvorima. Međutim razvoj bridga je uslovio da se značenje i svrha pojedinih licitacija mijenja. Jedna od najčešćih promjena koju su praktično usvojili gotovo svi prirodni sistemi licitacije jeste da se otvori 2 ♦, 2 ♥ i 2 ♠ smatraju slabim otvorima.

Zajednička karakteristika ovih slabih otvora jeste da se koriste sa listovima snage ispod 12 poena i da je boja otvora 6 karatna boja.

Postoji više razloga uvođenju ovakvog tretiranja i korištenja slabih otvora u boji na nivou 2. Jedan od osnovnih razloga jeste da listovi sa malo poena (ispod 12) ali dugim bojama (6 karata) svoju jedinu snagu u igri pokazuju ako je kontrakt baš u toj dugoj boji. Drugi razlog je taj da se ovakvim otvorima na relativno niskom nivou pokušava napraviti opstrukcija (smetnja) protivnicima u njihovom normalnom procesu licitacije. Drugim riječima ovakve licitacije se u bridge terminologiji često nazivaju baražne licitacije, što bi trebalo da znači da one predstavljaju određenu blokadu protivničkim licitacijama.

Uslovi za otvor 2 ♦, 2 ♥ i 2 ♠ su 6 karata u boji otvora i 6-12 poena. (Postoje i varijacije na ovu temu koje dopuštaju da snaga bude i 0 poena u slučaju da ste neranjivi protiv ranjivih protivnika).

RAZVOJ LICITACIJE NA SLABE OTVORE NA 2. NIVOU

Razvoj licitacije na slabe otvore na 2. nivou kao i u većini drugih slučajeva dijelom se zasniva na kombinovanom broju poena otvarača i njegovog partnera, ali za razliku od većine drugih otvora prije svega se bazira na distribuciji.

Prije nego uspostavimo određena pravila pogledajmo slijedeći primjeri. Pretpostavimo da je partner otvorio 2 ♥ i da imate slijedeći list:



Strogo brojeći samo poene možete reći da ovaj list ima 9 honerskih poena i još 3-4 distributivna poena. Sa otvaračevim maksimumom (12 poena) to je ipak nedovoljno za manšu. Ali kad probate da zamislite partnerov list sa kojim je otvorio 2 ♥ postaje vam jasno da je velika šansa da manša ipak postoji. Recimo da partner ima slijedeći list sa svega 7 honera i 2 distributivna poena:



Ova dva lista zajedno mogu u većini slučajeva da realizuju kontrakt 4 ♥ bez obzira što zajedno imaju svega 16 honerskih i 5-6 distributivnih poena. Međutim snaga ovih listova je u njihovoj iznimnoj distributivnosti koja im omogućava da jednostavnim bridge tehnikama (sječa u kraćoj ruci ili razvijanje dodatnih štihova malim kartama u dugim bojama) ostvare potrebnih 10 štihova.

Ovaj primjer nas vodi ka zaključku da u odgovorima na slabe otvore na nivou 2 prije svega treba da brojimo štihove a tek onda poene. Kako to izgleda možemo pogledati na prethodnom primjeru. Partner otvarača će na otvor 2 ♥ da pretpostavi da u ♥ nema gubitnih štihova zato što ima 4-tu Q i očekuje da otvarač ima oba visoka honera u toj boji. Za ♠ boju gdje ima singl očekuje da imaju zajedno samo 1 gubitni štih jer će ostale male karte u ♠ boji kod partnera posjeći svojim adutima. Za ♣ boju je slično rezonovanje. Može se pretpostaviti da će imati 2 gubitna štih a da će ostale karte ♣ kod otvarača posjeći svojim adutima. Za ♦ boju je važno da otvarač nema više od 2 karte, jer će u tom slučaju da sječom jednog ili 2 mala karona u otvaračevoj ruci napraviti ostale male karte u ♦ boji visokima. Sve u svemu ovaj list na otvor 2 ♥ ima mnogo šansi da realizuje manšu.

Pored toga licitacija 4 ♥ u prethodnom primjeru osim ofanzivne ima i defanzivnu snagu odnosno opravdanje. Moramo u razmatranju uzeti u obzir da gledano kombinovano obje prethodne ruke i otvaračevu i njegovog partnera da one zajedno posjeduju 10 herčeva i 8 karona. To njihovim protivnicima ostavlja svega 3 herca, pri čemu je u najboljem slučaju distribucija među njima 2-1 i 5 karona gdje je u najboljem slučaju distribucija među njima 3-2. To znači da ako igramo odbranu u ovom dijeljenju, a protivnici recimo izvode kontrakt 4 ♠ da

možemo u najboljem slučaju da osvojimo 1 herc štih i 2 karo štiha što znači da protivnici vjerovatno imaju kontrakt 4 ♠. Samim tim licitacija 4 ♥ se smatra opravdanom jer spriječava protivnike da izlicitiraju manšu u svojoj boji. Čak i jedan pad na 4 ♥ sa ili bez kontre je vjerovatno odličan rezultat u slučaju da protivnici imaju 4 ♠.

Prethodni primjer je bio jedna od ilustracija zašto se otvori 2 ♦, 2 ♥ i 2 ♠ zovu i baražni otvori.

Generalni principi razvoja licitacije na otvore 2 ♦, 2 ♥ i 2 ♠ su slijedeći:

- Jednostavna podrška otvaračeve boje na 3. i višim nivoima se smatra baražnim licitacijama i preduzima se u situacijama kada imate podršku u boji otvora bez mogućnosti da se igra manša i kada mogući broj padova na vaš kontrirani kontrakt je manje od moguće protivničke manše.
- Skok u manšu na otvore 2 ♦, 2 ♥ i 2 ♠ je apsolutni sign-off za otvarača.
- Licitacija 3 NT na otvore 2 ♦, 2 ♥ i 2 ♠ dolazi u obzir kada imate stopere u svim bojama i kada očekujete da ćete napraviti veliki broj štihova u otvaračevoj boji ili svojoj solidnoj 6 i više karatnoj boji.
- Poslije otvora 2 ♦, 2 ♥ i 2 ♠ svaka licitacija nove boje od strane partnera otvarača je forsing za jedan krug licitacije. Otvarač treba da podrži partnera ako ima 3 i više karata u njegovoj boji ili da ponovi svoju boju ako nema podršku.